

**Íþróttafélagið Höfrungur
Þingeyri**

**Stofnað 20. desember 1904
Kt. 481281-0329**



Ársreikningur 2023

Íþróttafélagið Höfrungur ársskýrsla 2023.

Árið hófst nú á því að í árslok 2022 var haldin áramótabrenna og nú hófust í rauninni aðrir tímar. Þarna var um myndarlega brennu að ræða og mikið skotið upp af flugeldum. Á þrettándanum tókst okkur loks að vera með skrúðgöngu og flugeldasýningu í samvinnu við Björgunarsveitina Dýra. Bæði um áramótin og á þrettándanum var mjög mikið skotið upp af flugeldum, enda veður mjög gott á þessum tíma. Samkvæmt samningi við HSV sáum við um þrif að afloknum þessum hátíðum og stóðu Höfrungar og fleiri sig vel eins og við var að búast gagnvart því. Margir eru mjög duglegir að taka til eftir sig og greinilegt að fólk er farið að sýna því virðingu að halda umhverfinu hreinu við svona tilefni. Þó er alltaf einn og einn sem eru sóði, en þá er gott að Höfrungur tekur málin í sínar hendur.

Öll regluleg starfssemi í íþróttahúsinu var í boði, svo sem HSV skóli, boðnir boccia tímar 3x í viku, foreldratímar í íþróttum á sunnudögum og fleira. Þetta fór samt hægt af stað vegna samkomutakmarkana sem höfðu lamað alla starfssemi meira og minna áður. Boccia náði þó ekki að verða öflugt aftur á árinu og enn sem fyrr féllu niður þau tvö mót sem Höfrungur hefur staðið fyrir þ.e. Halldórs Högna mótið og afmælimót Magnúsar Guðmundssonar. Nú var ekki hægt að kenna samkomutakmörkunum um heldur algjöru áhugaleysi og fólksfæð þar sem margir eldri borgarar voru annað hvort látnir eða hættir og ekki tókst að virkja nýja. Íþrótt- og leikjadagur sem Höfrungur hefur staðið að tengt skíðavíki varð að þessu sinni mjög öflugur og þátttaka alveg frábær. Aldrei svona mikil og bæði ungir sem aldnir tóku þátt. Á föstudaginn langa héldum við svokallað páskabingó og þar var þátttaka svo mikil að við urðum því miður að vísa fólki frá. Við áætluðum að þarna hefðu verið um 250 manns, en bingóið var haldið í félagsheimilinu Þingeyri. Samþykkt var eftir þetta að halda næsta bingó að ári í íþróttamiðstöðinni Þingeyri. Ekki tókst að koma leikriti á fjalirnar þessa páska þar sem okkur vantaði leikstjóra, en stefnan sett á næsta ár. Sporinn sem félagið keypti árinu áður nýttist vel og einhverjir voru á gönguskíðum. Fólk nýtti tímann betur til útiveru á þessum tíma. Hanna Gerður Jónsdóttir bauð ungmennum upp á styrktaræfingar í íþróttamiðstöðinni tvisvar í viku allt til vors. Íþróttakennarinn okkar hún Leyre Maza Alberdi bauð upp á æfingar tvisvar í viku tengt HSV einnig til vors og hóf störf aftur á haustdögum. Hún var með hinar ýmsu æfingar aðrar og má þar nefna sund. Sigþór Snorrason einkaþjálfari hélt áfram með hópaþjálfun og strax í haust jók hann starfssemina og bauð upp á þjálfun eldri og yngri hópa þ.e. tvisvar í viku. Þátttaka varð góð.

Fljótlega á vordögum eða í maí mátti sjá duglegt fólk bæði frá Höfrungi og aðra taka sig til og hreinsa meðfram vegum og úr skurðum eftir veturinn. Einnig fjörum og víðar. Það hefur tíðkast hjá fólki hér á Þingeyri að hreinsa vel landið hér umhverfis og Höfrungur gerir einnig út á að standa fyrir hreinsun hér innfjarðar. Þetta hefur tekist mjög vel og ég veit til þess að fólk hefur á göngum sínum í nánasta umhverfi tekið með sér allt rusl sem verður á

vegi þess og komið því til skila í viðeigandi gáma. Sumir eru mjög oft á ferðinni við þessa yðju. Það þarf ekki sérstaka plokkdaga til. Þetta er til fyrirmyndar og gildir sem fyrr Hreint land Fagurt land. Af framansögðu má sjá að Íþróttafélagið Höfrungur hefur staðið við alla samninga við HSV hvað varðar alls kyns þrif, en við hörmum að það fjármagn sem við höfum fengið greitt fyrir þetta hefur minnkað. Svæðið sem við sjáum um hefur svo sannarlega EKKI MINNKAÐ.

Haldið var fyrstu helgina í júlí svokallað stigamót BLÍ í strandblaki. Þátttakan í þessu móti hefur aukist ár frá ári og alltaf verið full mannað. Færri hafa komist að en viljað og við þurft að synja fólki um þátttöku. Við tókum ekki þá stefnu á þessu ári að nýta vellina tvo á Ísafirði sökum þess að það reyndist erfitt að vera á tveimur stöðum við mótið 2021. Gætum sjálfsagt bætt við fleiri þátttakendum ef við hefðum fleiri velli. Það eru ca. 120 lið sem taka þátt og það hefur sýnt sig að þetta hefur verið annað fjölmennasta mót ársins á öllu landinu. Undirbúningur fyrir slíkt mót er afar mikill og kostar félagið alltaf töluverðan pening og mikillar sjálfboðavinnu. Þessi mót hafa sem betur fer verið okkur til mikils sóma bæði hvað varðar alla framkvæmd og þá þjónustu sem við veitum. Umgjörð öll verið frábær undir stjórn yfirmanns mótshaldara Dýrleifar Hönnu og allra þeirra fjölmörgu sjálfboðaliða sem lögðu hönd á plóg. Í ár nutum við þess að nota 30 fermetra tjald sem Íslenskt Sjávarfang gaf okkur og það gerði alla starfssemi mun auðveldari hvað varðar veisluþjónustu matargerð o.s.frv. Eftir því var tekið hversu smekklegar allar auglýsingar, verð, tegundir o.fl. voru tengdar þessu móti.

8. maí 2023 var haldinn aðalfundur íþróttafélagsins Höfrungs og völdust til starfa mjög góður hópur stjórnarmanna og annarra sem unna starfssemi félagsins. Þetta ýtir að sjálfsögðu undir öflugri starfssemi og er það vel. Það er gott til þess að vita að enn er til hópur fólks sem er tilbúinn til sjálfboðaliðastarfa og erum við í samfélaginu í raun mjög rík af þeim mannauð sem hér er. Mörg félög á ekki fjölmönnum stað og margt að gera í hverju félagi og sannast hér hið margkveðna maður er manns gaman. Þetta er einmitt í anda UMFÍ og eitt af aðalsmerkjum hinna stóru sambanda.

Ekki tókst að manna íþrótt- og leikjanámskeið sem er vægast sagt dapurlegt. Auglýst var eftir starfsfólki en enginn var tilbúinn að slá til. Þetta eru sumarnámskeið og hafa verið mjög vinsæl í gegnum tíðina. Þetta eru að sjálfsögðu launuð störf og enn sem fyrr er skortur hér á fagfólki tengt íþróttum. Starfssemin ræðst af því fólki sem velst í þessi störf. Því er þetta í raun ófremdarástand og úr því þarf að bæta. Spurt er hvað er til ráða þegar enginn fæst? Ekki skortir fjármagn og því í raun ótrúleg staða sem ber að harma.

Þriðju helgina í júlí stóð Höfrungur fyrir svonefndri Hlaupahátíð á Vestfjörðum ásamt fjölmörgum öðrum. Þar er verið að tala um fólk frá Ísafirði Riddarar Rósu, öðrum einstaklingum þaðan ásamt heimamönnum sem ekki verða taldir upp hér. Þetta er mjög viðamikilið mót sem kostar mikinn undirbúning sem stendur yfir nær allt árið með hléum þó. Sjálft mótið er svo í fjóra daga, byrjar á fimmtudegi og lýkur svo á sunnudegi. Mörg hundruð þátttakendur voru á mótinu sem hófst í Bolungarvík á fimmtudegi. Daginn eftir

var keppt á Ísafirði og í Súðavík. Á laugardegi og sunnudegi var svo keppt á Þingeyri og náði keppnin allt yfir í Arnarfjörð. Þetta var sem áður risastórt mót og fjöldi tók þátt og mikill fjöldi fólks fylgdi keppendum. Þetta voru svo sannarlega dýrðardagar og veðrið lék við okkur að þessu sinni. Keppt var í hinum ýmsu greinum svo sem hlaupum, sjósundi og fjallahjólreiðum. Mótið tókst í alla staði vel og ber að þakka öllum þeim fjölmörgu sjálfboðaliðum sem tóku þátt og unnu að því að gera þetta mót svo virðulegt sem það er. Hér ræður miklu sú aðstaða sem við höfum við Íþróttamiðstöðina Þingeyri og ekki skemmdi fyrir að hafa nýtt tjald til að veita þjónustu úr.

Á haustdögum færðist flest öll starfssemi aftur inn í íþróttahús og reglubundin dagskrá hófst aftur. Þátttakan jókst verulega og fjölmargt var í boði og reynt var að brydda upp á nýjungum sem tókst mjög vel. Yngstu kynslóðinni var sinnt mjög vel og boðið upp á sérstakar íþróttir á sunnudagsmorgnum þar sem stjórnarmeðlimir skiptust á um að stjórna hinum ýmsu þrautarplönnum og fleiru því tengt. Leikskólinn Laufás fékk tíma allt árið hjá Höfrungi einu sinni í viku og það var að sjálfsgöðu vel sótt. Hópaleikfimi hélt áfram og önnur starfssemi tengd Grunnskóla Þingeyrar var í gangi. Íþróttþjálfari sem starfaði hjá Grunnskólanum starfaði hjá okkur allt árið en þó ekki fyrr en á haustdögum eins og áður er getið. Það er ljóst að ekki væri hægt að bjóða upp á öflugt íþróttastarf ef við hefðum ekki hina dásamlegu Íþróttamiðstöð. Það ber að þakka allt það góða samstarf sem þar fer fram.

Í október lentum við í hræðilegum skakkaföllum er sundlaugin okkar góða tók upp á því að leka og það mikið að lokað var fyrir starfssemi hennar 18. október. Þessi lokun stóð yfir í meira en fjóran og hálfan mánuð sem mér finnst alveg með ólíkindum. Einhverjir hefðu orðið BRJÁLAÐIR í okkar sporum. Ekki var hægt að fara í sund fyrr enn í mars 2024. Af þessum sökum vorum við ekki með í sundátaki Sundsambands Íslands sem hafði heppnast svo frábærlega hjá okkur árið á undan. Reynt var að halda allri annarri starfssemi áfram og má hæla því starfsfólki íþróttamiðstöðvarinnar sem létti okkur daginn við þessar aðstæður. Þetta var ekki góð staða en geðgott fólk þreytti þorrann með bros á vör þrátt fyrir allt.

Í desember var margt gert og lagði Höfrungur fram vinnu með veitingum, kakói og fleiru þegar kveikt var á jólatrénu á aðventunni. Þetta er alltaf hátíðleg stund og nauðsynlegt í skammdeginu. Regluleg starfssemi hélt áfram í íþróttahúsinu og ýmislegt nýtt var á dagskránni í desember sem jók mannlífið til muna. Líf og fjör á aðfangadag með frábærri þátttöku barna og jólasveinarnir mættu meira að segja. Þetta er svo sannarlega félagsmiðstöð okkar Þingeyringa og fleiri og ber að þakka allt það sem gert var þar. Bæði sjálfboðaliðum og þátttakendum og ef ekki nyti þeirra við væri lítið gert. Desember lauk svo með hinu árlega jólaballi með stæl og nú voru engar samkomutakmarkanir. HÚRRA fyrir því.

Hinar ýmsu fjáraflanir urðu á árinu og fjöldi styrkja fengust. Margir smáir styrkir fengust en margt smátt gerir eitt stórt. Lottó og getraunatekjur eru alltaf góðar tekjur og skipta

miklu máli, en gera mætti betur við öflun getraunatekna. Félagsnúmer HÖFRUNGS þar er 470. Hér er því sérstaklega þakkað fyrir allar góðar gjafir og styrki sem Höfrungur hefur fengið á árinu Félagar í Höfrungi voru duglegir að hlúa að sínu félagi og því segjum við ÁFRAM HÖFRUNGUR.

F.h. Höfrungs, Sigmundur Fríðar Þórðarson formaður.